



ꦲꦮꦶꦒ꧀ꦲꦮꦶꦒ꧀  
AWIG – AWIG

ꦢꦺꦱꦩꦤ꧀ꦢꦸꦏ꧀  
DESA ADAT BUDUK



ꦢꦺꦱꦩꦤ꧀ꦢꦸꦏ꧀ꦠꦺꦩꦏꦶꦩꦺꦤꦒꦶꦏꦧꦸꦥꦠꦺꦤ꧀ꦨꦢꦸꦁꦲ  
DESA BUDUK, KECAMATAN MENGWI, KABUPATEN BADUNG

ꦧꦺꦩꦶꦏꦺꦩꦸꦩꦠꦺꦤ꧀ꦨꦢꦸꦁꦲ









**PIDAGING MAKA BANTANG AWIG – AWIG  
DESA ADAT BUDUK**

MURDHA WAKYA

KASUKSMAN PRALAMBANG DESA ADAT BUDUK

PIDAGING BANTANG AWIG – AWIG DESA ADAT BUDUK

SARGAH PRATAMA ARAN LAN WEWIDAGAN DESA

SARGAH KALIH PAMIKUKUH LAN PATITIS

SARGAH TIGA SUKERTHA TATA PARHYANGAN

Palet 1	Indik Dewa Yajnya
Palet 2	Indik Pitra Yajnya
Palet 3	Indik Bhuta Yajnya
Palet 4	Indik Manusa Yajnya
Palet 5	Indik Rsi Yajnya

SARGAH PAPAT SUKERTHA TATA PAWONGAN

Palet 1	Indik Krama
Palet 2	Pamucuk Desa
Palet 3	Indik Kulkul
Palet 4	Indik Paruman
Palet 5	Indik Padruwen Desa
Palet 6	Indik Penyanggran Banjar
Palet 7	Indik Pawiwahan
Palet 8	Indik Santana
Palet 9	Indik Nyapihin
Palet 10	Indik Warisan

SARGAH LIMA SUKERTHA TATA PALEMAHAN

Palet 1	Karang, Tegal lan Carik
Palet 2	Setra
Palet 3	Papayonan
Palet 4	Wawangunan
Palet 5	Wawalungan
Palet 6	Karesikan Desa Adat

SARGAH ENEM WICARA, BHAYA, DUSTA LAN PAMIDANDA

Palet 1	Indik Wicara
Palet 2	Indik Bhaya lan Dusta
Palet 3	Indik Pamidanda

SARGAH PITU NGUWAH – NGUWUHIN AWIG – AWIG

SARGAH KUTUS SAMAPTA

LEPIHAN

**SARGAH PRATAMA.  
ARAN LAN WEWIDANGAN DESA.**

**Pawos 1.**

1. Dèsa adat puniki mawasta Dèsa Adat Buduk.
  
2. Jebar wewidangannya mawates nyatur ring :
  - ha. Sisi wètan : Tanah Ampo – Pangkung Bolo – Yéh Miyah
  - na. Sisi kidul : Teratesan Dangin Sema ke Madwi
  - ca. Sisi kulon : Tukad Yéh Busak
  - ra. Sisi lor : Jelinjingan Uma Manteri
  
3. Jebar inucap malinggah 363,46 hèktar
  
4. Karang Dèsa Adat Buduk kawangun antuk karang kedi, lan gebogan krama kepah dados 10 (dasa) banjar adat lui rè :
  - ha. Banjar Adat Bernasi;
  - na. Banjar Adat Tampak Kerep;
  - ca. Banjar Adat Kaja;
  - ra. Banjar Adat Tengah;
  - ka. Banjar Adat Sengguan;
  - da. Banjar Adat Pasekan;
  - ta. Banjar Adat Umategal;
  - sa. Banjar Adat Umacandi;
  - wa. Banjar Adat Umakepuh;
  - la. Banjar Adat Gunung.

**SARGAH KALIH.  
PAMIKUKUH LAN PATITIS.**

**Pawos 2.**

- Dèsa Adat Buduk puniki ngamanggehang pamikukuh mekadi ring sor :
- ha. Pancasila;
  - na. Undang-Undang Dasar 1945;
  - ca. Tri Hita Karana manut Sadacara Agama Hindu;
  - ra. Sahanan Peraturan Negara Republik Indonesia lan Undang-Undang Negara Republik Indonesia;
  - ka. Uger – uger saking Guru Wisesa indik Desa Adat.

**Pawos 3.**

- Luir patitis Dèsa Adat Buduk :
- ha. Mikukuhin maka miwah ngajegang Agama Hindu;
  - na. Nginggilang tata prawerti māgama;
  - ca. Ngajegang kasukertan dèsa saha pawongannya sekala kalawan niskala;
  - ra. Ngajegang kasukertan druwen desa.

**SARGAH TIGA**  
**SUKERTHA TATA PARHYANGAN**

**Palet 1**  
**Indik Dewa Yajnya**  
**Pawos 4**

1. Palinggih panyiwian desa ring wewidangan Dèsa Adat Buduk luiè :
  - ha. Pura Dèsa, sanè kasiwi tur kasungkemin olih krama Dèsa Adat Buduk sagrehan;
  - na. Pura Puseh, sanè kasiwi tur kasungkemin olih krama Dèsa Adat Buduk sagrehan;
  - ca. Pura Dalem (Pura Dalem Wayah; Pura Dalem Gede, lan Pura Dalem Tunon), kasiwi tur kasungkemin olih krama Dèsa Adat Buduk, sanè pelaksanān panyiwian manut dresta tetamian. Ri sejeroning tata cara pangempon panyiwian lan panyungkeman inucap saeloan ring tata cara pedum nganggè sètrania sanè sinanggeh sètran Pura Dalem soang-soang;
  - ra. Panganyutan utawi Taman Beji Pitra Yajnya, sanè kasiwi tur kasungkemin olih krama Dèsa Adat Buduk sagrehan;
  - ka. Sajaba sanè inucap ring ajeng, taler wènten Kahyangan sanè kasiwi lan kasungkemin olih Pamaksan lan Kahyangan sanè kasiwi utawi kasungkemin olih krama pasawahan utawi pasubakan.
2. Rahina piodalan utawi tetoyan ring pura - pura inucap, kadi ring sor :
  - ha. Pura Dèsa, rikala Reditè Umanis wuku Langkir;
  - na. Pura Puseh, rikala Anggara Kliwon wuku Julungwangi;
  - ca. Pura Dalem Wayah, rikala Anggara Kliwon wuku Tambir;
  - ra. Pura Dalem Gede, Anggara Kliwon wuku Dukut;
  - ka. Pura Dalem Tunon, rikala Purnama wuku Tambir utawi nemonin purnama wusan wuku Tambir;
  - da. Panganyutan utawi Taman Beji Pitra Yajnya, rikala Saniscara Kliwon wuku Klurut.
3. Pangaci ring pura inucap manut kecap sastra agama, saha kalaksanayang nista, madya, utama, manut kawentenan lan pararem.
4. Panemayan piodalan utawi patirtan ring kahyangan désa minakadi ring Pura Désa, Balé Agung, Melanting, Pura Puseh lan Pura Dalem kawéntenang ngenem sasih apisan luiè; apisan patirtan alit lan apisan patirtan ageng.
5. Piodalan ring beji utawi pasiraman Desa lan Puseh, asapunika taler ring Dalem pelaksanānnya sekadi dresta tetamian.
6. Pura-Pura sanè siosan sanè wènten ring wewidangan Dèsa Adat Buduk, kasukserah ring pangemponia utawi pangamongnia.

**Pawos 5**

1. Ring soang-soang pura inucap patut kawentenang pamangku.
2. Tata cara ngadegang pamangku manut sakadi ring sor :
  - ha. Sesorod sentana wiadin katurunan;
  - na. Nyanjan (mapinunas ring ajeng penataran Ida Bhatara, lan sapanunggilania);
  - ca. Sangkaning kasudi saha kacumpuin olih krama pamaksan utawi krama dèsa.
3. Sane tan wenang kādegang pamangku inggih punika :
  - ha. Cèda angga luiè : pècèng, perot, cungh;
  - na. Sang sapisira ugi sane tan kepatutang manut sastra agama lan perarem;
  - ca. Kageringan : sakit ila, ayan, buduh wiadin sapanunggalnia;
  - ra. Sane maduwe parilaksana tan becik manut perarem;

4. Prabeya ngadegang pamangku :
  - ha. Eka jati utawi pawintenan kamedalang saha kalaksanayang olih sané ngadegang makadi krama desa adat utawi pangempon pura soang-soang;
  - na. Pitra yajnya riwekas pamangku lampus, patut kasungkemin antuk krama desa adat utawi pangempon sanistane Brahma Prayascita utawi ngaben manut pararem.
5. Pamangku patut ngamanggehang sasananing pamangku manut kadi linging sastra agama lan perarem

### **Pawos 6**

1. Swadarmaning pamangku :
  - ha. Pamangku Kahyangan Tiga ngénterang upakara piodalan ring Kahyangan Tiga, utawi ring pura-pura sanè siosan;
  - na. Ambek dharma sadhu, Aséwaka dharma, Makadang sastra utama;
  - ca. Tan wenang salab sulub, tan pati pikul – pikulan, yan memurug wenang pamangku nyepuh raga manut perarem;
  - ra. Ngaturang panawuran sinalih tunggil krama dèsa lan warga dura dèsa;
  - ka. Nitenin keresikan, lan ngupadi kasucian ring Pura amongania;
  - da. Ngaryanin aturan ring pura amongania, minakadi nemoning Purnama, Tilem, Kajeng Kliwon utawi Rerainan Jagat sane siyosan;
  - ta. Ngraksa saha miara pralingga lan busana pura soang – soang tur masadok ring prajuru yéning wenten busana, pelinggih sane rusak utawi karusak;
  - sa. Pamangku patut masadok ring prajuru dèsa mangda kailikitayang tur kaanggehang druèn dèsa pradè wènten panawuran punika marupa artha brana utawi raja brana;
  - wa. Muputang yajnya kanista utawi alit miwah madya. Yening mautama yajnyané patut nuwur sang sulinggih nganutin dresta kuna lan pamangku minakadi panyanggra;
  - la. Ngelaksanayang utawi ngénterang upacara-upacara kramané ring suang-suang paumahan nganutin sesana yéning katuwur olih krama;
  - ma. Pamangku Kahyangan Tiga kawenangang nibakang bebawosan ring pamangku pura pajengan desa, kasinoman, lan prajuru dèsa, polih panampa rikala ngamargiang pujawali, saking wargan danè jro mangku.
  - ga. Juru canang lan kasinoman pura polih panyepuhan saking krama dèsa, manut pararem.
2. Petias utawi olih-olihan pamangku luire :
  - ha. Panyolasan miwah sarin canang sane ke pah manut perarem;
  - na. Upon palabha carik utawi tegal manut pararem;
  - ca. Luput pakaryan lan rarampen utawi raramon, padagingan keni kadi patut;
  - ra. Petias sane tiosan manut perarem;

### **Pawos 7**

1. Pamangku kagentosin riantukan :
  - ha. Seda utawi lampus;
  - na. Pinunas ngraga manawi kageringan lan sapanunggilan ipun;
  - ca. Nilar sesana lan susila nganutin sastra agama lan perarem;
  - ra. Pradè pamangku malih ngalap rabi, patut mararean. Kengin kādegang malih olih krama, patut pamangku nyepuh raga kesarengin rabi ring Pura manut sengker lan prabea kaetang manut pararem;
2. Yan pradé wènten Pamangku kabuktiang animpang laku, melaksana asta dusta, nyasar ring sesana, Pamangku inucap patut kanorayang dados Pamangku tur katiwakin pamidandha muah pamatut manut pararem;

### **Pawos 8**

Kasukertan kahyangan ring desa :

1. Sane nénten kalugra ngaranjing kapura lwire :

- ha. Sang katiban cuntaka, makadi sebel raga :
    - 1) Sebel kandel, ngraja sewala, selami durung polih pabresihan;
    - 2) Sebel sangkaning madruwe putra manut perarem;
    - 3) Sebel pangantenan, sadurung mabiakala lan malapeh;
    - 4) Sebel sangkaning kalayu sekaran manut sengker;
  - na. Sang patita utawi panak babinjat, Wang beling kasanggaman tan sinangaskara, Memitra ngalang, Wang Gila, miwah candala – candala lianan sedurunge kalukat ke prayascita manut agama.
  - ca. Makta sahananing sane kasinanggeh ngaletihin manut perarem;
  - ra. Wawalungan suku pat, sajawaning rikala mapepada;
  - ka. Mabusana sane tan manut kadi tata caraning busana ngaranjing kapura;
  - da. Anak alit sadurung mayusa tigang sasih;
  - ta. Sadurung polih wak-wakan (pituduh) prajuru desa adat;
2. Busana ngranjing kapura wenang nganutin dresta minakadi :
    - ha. Ritatkala ngaturang ayah, mawastra lan nyalempot utawi busana adat madya;
    - na. Ritatkala ngaturang sembah, mabusana jangkep, lan sané istri patut mapusungan manut perarem;
    - ca. Siosan kadi ring ajeng nenten kalugra, sajawaning sampun pituduh prajuru;
  3. Parilaksana tan kawenangan ring pura, luire :
    - ha. Masuara sane kasinanggeh wak parusya, wak capala;
    - na. Makoratan utawi mabacin, mawarih, masanggama;
    - ca. Masumpah utawi macoran sajawaning pituduh prajuru desa;
    - ra. Mejaljal, mayudha bilih – bilih yan jantos kanin ngewetuang rah;
    - ka. Sané maaras – arasan lan macumbana, nyusuin;
    - da. Ngias raga lan ngelukar busana sajawaning sulinggih miwah pemangku lan pragina;
    - ta. Mungguh tedun ring palinggih sajawaning pituduh prajuru desa;
  4. Sang mamurug kadi kecape ring ajeng, keni pamidandha muang pamrayas-cita sapatutnyane;

### **Pawos 9**

1. Yan wenten jadmā karawuhan ring pura tur ngaku - ngaku Déwa, pradé rumasa kasumangsayan, wenang kapintonin olih prajuru désa saha upakara, yan tan tuhu Déwa malingga ring jadmā inucap, patut katibaning dandha manut pararem;
2. Pradé kahyangan kahanan dhurmanggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngawentenang upacara sapatutnya;

### **Palet 2 Indik Pitra Yadnya**

### **Pawos 10**

Sahanan upakara mratéka sang wus lampus kabawos pitra yajnya. Pitra yajnya matetuwek ngwentenang yajnya pinaka bhakti swadarmaning putra sesana ring sekala niskala lan swadarmaning sang sane maurip marep ring sang sane lampus.

Pangupakaran sang lampus :

- ha. Rarè sanè lampus sadèrèng kepus udel rawuhing mayusa 42 rahina, tan dados kaabèngang;
- na. Pungkuran yaning jagi pacang mebéya ring raré sane karuron utawi sane durung kepus udel kedadosang wantah melangkir manut perarem;
- ca. Rarè sanè mayusa lintang saking 42 rahina, rauhing durung ketus untu dados kaabèngang mawasta nglungah;
- ra. Menawi sampun ketus untu rawuhing wreda dados kaabèngang.
- ka. Sang sané meraga Pemangku utawi polih pawintenan widhi tur kesaksi antuk

### **Pawos 11**

1. Swadarmaning lan tetegenan pradè wèntèn sinalih tunggil krama désa adat lampus, sang kaduhkitan utawi sang maduè alang patut nyadokang ring prajuru banjar, salanturipun prajuru banjar nyadokang ring prajuru désa, nunas uwak-uwakan atiwa-tiwa;
2. Pemargin atiwa – atiwa krama tamiu utawi tiyosan ring sane megama hindu patut mesadok ring prajuru banjar tur nunas wak – wakan saking Bandesa Adat.
3. Swadarmaning banjar patut nyanggra manut pararem;
4. Dina larangan atiwa-tiwa miwah mendem sawa:
  - ha. Purnama lan Tilem;
  - na. Pasah, Kajeng Kliwon, Perwani, Kala Gotongan lan Semut Sadulur;
  - ca. Rerahinan Jagat, piodalan Kahyangan Desa utawi panyiwian banjar, lan Ida Bhatara nyejer;
  - ka. Pradè wènten silih sinunggil krama banjar utawi desa sane sampun panemaya ngemargiang dewa yajnya;
5. Satunggilin Sétra tan kedadosang mendem utawi ngeseng sawa:
  - ha. Nyandung; mendem muang ngeseng sawa ngapuanang;
  - na. Makirim; mendem muang ngeseng sawa neren utawi nyabran rahina;
  - ca. Tan wenang mendem lan ngeseng sawa tetiga ring satunggilin setra arahina;
  - ra. Pemargi sawa ritakala ke sétra tan wenang ngelangkar watang;
  - ka. Yaning wénten jadmá istri padem kantun bobotan, tan wenang pendem utawi geseng sedurung bobotané embas, yadiastun maurip utawi lampus;
6. Rikala sang kaadegang Pamangku Kahyangan Tiga Lanang utawi Istri riwekasan séda, patut i krama désa nyanggra antuk patus marupa beras, taluh, klapa, kasa utawi jinah akéhnyané manut pararem;
7. Etangan utawi pemargin pitra yajnya patut saeloan ring désa dresta, tan kalugra ngemargiang dresta dura désa, bilih – bilih tan manut ring sastra agama;
8. Yéning wenten krama désa nyekeh sawa, tan dados lintangan ring nem sasih ngawit saking rahina nyekeh. Indik cuntaka krama banjar wantah tigang rahina saking peleletan, wenang keprayascita, malih ngelantur ring pelebon ngambil malih tigang rahina.
9. Yan pradé wénten karya ageng ring Khayangan Jagat tur sangkaning pituduh saking guru wisesa patut tinutin.

### **Pawos 12**

1. Sane kasinanggeh kacuntakan sekadi ring sor :
  - ha. Cuntaka sangkaning kalayu sekaran utawi lampus;
  - na. Cuntaka sangkaning ngraja sewala;
  - ca. Cuntaka sangkaning ngembasang putra;
  - ra. Cuntaka sangkaning karuron;
  - ka. Cuntaka sangkaning pawiwahan;
  - da. Cuntaka sangkaning gamia gamana;
  - ta. Cuntaka sangkaning salah timpal;
  - sa. Cuntaka prade wenten anak istri mobot nenten kaupakara pabiakawonan tur tan pawidhi widhana;
  - wa. Cuntaka sangkaning mamitra ngalang;

- Ia. Cuntaka sangkaning wenten anak istri ngembasang putra sadurung maupakara pabiakawonan utawi pekalan – kalan saha widhi widhana;
2. Sengker cuntaka manut kawentenanya :
- ha. Cuntaka kalayu sekaran, cuntakanya ngantos kamargiang masapuh-sapuh manut dresta;
  - na. Cuntaka ngraja sewala, 3 dina ngawit saking ngraja sewala utawi salaming ngraja sewala;
  - ca. Cuntaka ngembasang putra, 42 dina utawi abulan pitung dina, ngawit saking putrane embas ngantos sampun kaupakara makambuhan tur maprayascita manut agama, lanang lan istri;
  - ra. Cuntaka sangkaning karuron abulan pitung dina (42 rahina) tur sampun maprayascita;
  - ka. Cuntaka sangkaning pawiwahan, cuntakanyané ngantos sasampun kamargiang pabiakawonan lan malapeh;
  - da. Cuntaka sangkaning gamia gamana, cuntakanya ngantos sasampune kapalasang tur sampun kawentenang pamrayascita raga miwah pamrayascita desa adat lan kahyangan;
  - ta. Cuntaka sangkaning salah timpal kapuputang sakadi ring Agama Hindu tur dresta miwah adat sane manggeh;
  - sa. Cuntaka sangkaning anak istri mobot nenten madasar antuk ngamargiang upacara pabiakawonan, cuntakan nyane ngantos kawentenang upacara pabiakawonan lan pekalan - kalan;
  - wa. Cuntaka sangkaning mamitra ngalang cuntakanya ngantos kawentenang pamargi parabian lan kamargiang upacara pabiakawonan;
  - la. Ngembasang putra sangkanin nenten kawentenang upacara pawidhi widhana, cuntaka ngantos wenten putrane mameras, tur sampun kawentenang upacara manut sastra Agama Hindu;
3. Cuntaka sangkaning kalayu- sekaran utawi sangkaning seda utawi lampus.
- ha. Mapendem cuntakan nyane :
    - 1) Cuntaka utawi sebel banjar rawuhing 3 dina riwusan mendem utawi sasampun polih prayascita (masapuh-sapuh);
    - 2) Kulawarganya sajeroning pakarangan keni cuntaka ngantos roras dina.
  - na. Atiwa-tiwa utawi ngaben cuntakan nyane :
    - Sang nyambut karya Pitra Yajnya cuntakanya ngawit saking ngarancang karya (pangalang sasih) rawuh huwus yajnyania (mapegat);
4. Tan keneng cuntaka luire :
- ha. Sulinggih;
  - na. Pamangku Kahyangan Tiga tan keni cuntakaning wang liyan, yan tan mejenukan, nanging satwika ring angga;
  - ca. Rikala piodalan;
  - da. Yéning Pamangku ring kulawarganyané utawi yén wénten siwanyané sané pinaka Guru Nabé séda (napak duking ekajati), keni cuntaka 3 (tiga) rahina lawasnyané, taler meprayascitta yéning durung puput sengkernya tan kengin munggah - munggah ring palinggih;

### **Pawos 13**

1. Atiwa-tiwa (pangabenan) kamargiang antuk :
  - ha. Nyawa Resi utawi nenten ngupapira sawa, santukan tan ngagah utawi manawi sawa tan kakeniang;
  - na. Sawa prateka utawi ngupapira sawa.
2. Panumaya pangabenan wenten 2 soroh :
  - na. Ngaben dadakan (bah-bangun), kadadosang sajeroning banjar/tempekan;
  - na. Ngaben ngamasa;
3. Dudonan pangabenan ngawit saking ngagah, ngeseng ngantos pangiriman utawi nganyut;
4. Pemargi ngagah ritatkala atiwa – tiwa manut perarem

5. Kremasi, sangkaning tan ngamiletin ring panyiwian kahyangan tiga, pemarginyane manut perarem

### **Pawos 14**

1. Papatusan pangabenan wenten kalih pawos :
  - ha. Ngaben ngamasa patusnyane manut dresta miwah pararem banjar soang-soang;
  - na. Ngaben dadakan, patusnyane pateh sakadi patus padem mapendem lan k̄anutang ring perarem lan dresta soang-soang;
2. Upacara Pitra Yajnya sajangkepnyane kamargiang mabantang antuk awig-awig desa adat lan panglaksanannyane kamanggehang tur kamargiang manut drestan banjar soang-soang;

### **Palet 3 Indik Bhuta Yajnya Pawos 15**

1. Bhuta Yajnya inggih punika upakara-upacara biakala ring prethiwi lan kahyangan, sarwa prani lan upakara-upacara ring bhuta kala;
2. Upacara pabiakala ring sarwa prani luire :
  - ha. Ring sarwa tumuwuh kamargiang rikala tumpek pangatag (Saniscara Kliwon Wariga);
  - na. Ring sarwa ingon-ingon rikala tumpek andang (Saniscara Kliwon Uye);
  - ca. Upacara pakala-kalan manusa manut wiguna kabawos pabiakala;
3. Pacaruan ring banjar-banjar sajroning Dèsa Adat Buduk, ngraris pacaruan ring pomahan manut sasih lan tilem kesanga saking paètangan prajuru dèsa adat.;
4. Pacaruan inucap ring ajeng nista, madya, utama manut wiguna kadi ring sor :

ha. Ekasata;	ka. Rsi Ghana;
na. Pancasata;	da. Balik Sumpah;
ca. Panca sanak;	ta. Tawur Agung;
ra. Panca kelud;	sa. Labuh Gentuh;
5. Sajawaning kadi ring ajeng taler kawentenang upacara :
  - ha. Yajnya sesa nyabran sasampun wusan maratengan;
  - na. Masapuh-sapuh rikala pacang wali ring pura;

### **Pawos 16**

1. Nangken ngawarsa rikalaning tilem kasanga kawentenang tawur kasanga, wusan punika kamargiang pangrupukan, benjangnyane kawastanin dina nyepi.
2. Ring dina nyepi patut kamargiang catur brata panyepian, luih ipun :
  - ha. Amati geni : tan kengin ma - api-api;
  - na. Amati karya : tan kengin nyambut karya;
  - ca. Amati lalangan : tan kengin maoneng-onengan, masuara ghora, maklecan, mejudi lan sapanunggilan ipun;
  - ra. Amati lalungan : tan kengin malancaran;
  - ka. Pemargin catur brata penyepian ring ajeng patut kaetangan olih prajuru desa.
3. Babratan inucap kamargiang saking galah enem semeng ngantos galah enem semeng benjangnyane.
4. Sang mamurug kecaping ajeng keni pamidandha manut pararem ring banjar soang - soang, sane kamargiang antuk panrepti desa (pecalang desa);

5. Riwus dina nyepi (benjangne) maka cihna pangawit Icaka Warsa anyar, patut soang-soang warga desa sami pada ngaksamayang utawi Dharma santhi.

**Palet 4**  
**Indik Manusa Yadnya**  
**Pawos 17**

1. Manusa Yadnya inggih punika upakara-upacara manut dharmaning manusa prawerti;
2. Upacara kadi ring ajeng madudonan sakadi ring sor :
  - ha. Magedong-gedongan kamargiang risampun bobotane mayusa 5 sasih;
  - na. Duk rare medal utawi embas (lekad rare);
  - ca. Kepus udel;
  - ra. Roras dina;
  - ka. Tutug akambuhan (42 rahina);
  - da. Tigang sasih (nelubulanin) ;
  - ta. Pawetuan utawi otonan (6 sasih);
  - sa. Tutug kelih (ngraja swala, ngraja singa);
  - wa. Matatah utawimapandes;
  - la. Mawiwaha;
  - ma. Mawinten;
3. Upakara-upacara inucap nista, madya utama manut sastra agama saha catur dresta, maka babuatan desa dresta, ngawinang sima cara desa;

**Palet 5**  
**Indik Resi Yajnya**  
**Pawos 18**

1. Sang pacang madwijati utawi mapodgala madeg sulinggih sané kabawos pinaka sang Sadaka, patut masadok ring prajuru désa kalih Parisadha Hindu Dharma;
2. Sajawaning Pamangku sang pacang mawinten maka buatan pamargi nyonténg, dalang, sakaluir jaga ngénterang yajnya patut masadok ring prajuru banjar lan désa;
3. Prajuru desa patut nitenin tur wenang ngalangin prade wenten kacihna lempas ring daging sastra miwah drestane, tur sareng nyaksinin upacara saha nyobyahang ring paruman desa tegep rawuhing bhisekannyane.

**SARGAH PAPAN**  
**SUKERTHA TATA PAWONGAN**

**Palet 1**  
**Indik Krama**  
**Pawos 19**

1. Krama Desa inggih punika satunggil warga sane jumenek ring wawidangan desa tur pastika ilikitannyane;
2. Dudonan papalihan krama desa wenten 3 soroh, luwire:

- ha. Krama Adat inggih punika, krama sané nyarengin adat, magama Hindu , sampun marabian lan tedun mabanjar Adat, mipil lan sareng nyungkemin kahyangan tiga, tur sutindih ring desa adat Buduk;
- na. Negakin karang apelebahan, asapunika taler sane magenah jenek sajeroning palemahan Desa Adat Buduk, sane mawit saking dura desa adat Buduk utawi krama desa Adat Buduk sane mawit saking desa Adat Buduk megenah ring dura desa adat Buduk mipil lan sareng nyungkemin kahyangan tiga, tur sutindih ring desa adat Buduk.
- ca. Krama Tamiu, inggih punika kulawarga sane nenten māgama Hindu, jenek ring wawidangan desa adat Buduk lan wantah sareng nyungkemin ring pawongan lan palemahan utawi suka duka desa adat kewanten;
- ra. Tamiu inggih punika, krama saking dura desa adat Buduk, sane māgama Hindu lan nenten māgama Hindu, nenten mipil maduwe umah utawi numpang ring krama gumanti ngerereh pangupajiwa.

### **Pawos 20**

Krama Desa Adat Buduk wenten 4 (petang) soroh:

1. Krama ngarep inggih punika krama sane nyarengin adat, sampun marabian, magama Hindu, mipil, tur nyungkemin kahyangan tiga lan sutindih ring desa adat;
2. Krama, tan ngarep, luwire :
  - ha. Krama Paron inggih punika krama saking dura desa sane sampun masadok ring prajuru banjar lan desa, lan sampun madruwe tanah karang pumahan, tur sampun jenek ngawit 6 (nem) sasih nyantos 10 (dasa) warsa;
  - na. Krama Panyade : krama sane mewiwit saking Desa Adat Buduk sane nyade ayahan krama ngarep.
  - ca. Krama Pangele inggih punika krama desa adat Buduk, utawi krama saking dura desa sane wenten pakilitan ring krama ngarep lan jumenek ring krama ngarep;
  - ra. Krama daha taruna inggih punika krama sane mayusa 13 warsa rauh 30 warsa sane durung marabian;
  - ka. Krama datu : krama sane mayusa lintangan ring 30 warsa tur durung naenin merabian;
3. Krama Balu inggih punika krama sane katinggalin sangkaning sane istri utawi sane lanang padem utawi sangkaning nyapihan. Krama balu kepeah dados 4 (petang) soroh :
  - ha. Balu makrambian : Balu sane sampun madruwe pianak cucu tur tan marabian malih;
  - na. Balu ngempu : Balu sane madruwe pianak kantun alit;
  - ca. Balu ngatung : Balu sane nenten madruwe pianak utawi santana;
  - ra. Balu ngelisting : Balu sane nenten madruwe pianak, arta warisan lan sameton;
4. Tategenan miwah swadarma krama desa adat luire :
  - ha. Krama ngarep, keni urunan utawi punia miwah ayahan mamungkul;
  - na. Krama Paron keni ayahan manut kawigunan, keni dana punia manut perarem;
  - ca. Krama balu, keni ayah manut kawonganya :
    - 1) Balu ngelisting, lanang utawi istri keni ayahan lanang utawi istri.
    - 2) Balu makrambian, lanang utawi istri sane madruwe santana lanang utawi istri sampun mayusa 17 (pitulas) warsa keni ayahan balu;
    - 3) Balu nyapian, kadadosang luput papeson sakewanten keni ayah manut arah-arahan banjar/desa adat yening balu lanang ayah lanang, balu istri ayah istri;
  - ra. Krama pangele, keni ayah-ayahan sakadi maresesik ring kahyangan tiga, banjar lan sane tiosan manut ring kawigunan;

### **Pawos 21**

Tata caraning ngaranjing dados krama desa :

1. Ngawit dados krama desa inggih punika :
  - ha. Mawit negakin tanah apelebahan lan mipil.
  - na. Mawit jumenek mapaumahan wiadin ngeruruh pangupajiwa sejeroning palemahan desa adat buduk;

- ca. Mawiwit sangkaning pawiwahan;
2. Panumaya tedun makrama desa :
    - ha. Malarapan antuk pawiwahan risampun katedunang makrama banjar.
    - na. Malarapan ngruruh karya utawi pangupajiwa saha jumenek risampun katedunang makrama banjar.
    - ca. Malarapan patilar rahayu warga dèsa tiosan, patut makrama dèsa risampun atur supèksa ring prajuru dèsa adat buduk.
  3. Sang saking séwosan dèsa yaning sareng tedun makrama dèsa ring dèsa adat patut keni pacingkrem, sané ageng nyané kasulurang manut pararem;
  4. Yan wénten krama saking séwosan dèsa sareng ngranjing makrama dèsa ring Désa Adat patut kadulurin antuk:
    - ha. Likita saking desa wed nyané, sané tegap lan jangkep;
    - na. Masadok ring Kelian Banjar manut ring pikamkam Adat lan kadinasan.
    - ca. Naur prabea penanjung batu utawi pacingkrem manut pararem Banjar Adat utawi Desa Adat;

## Pawos 22

1. Krama desa adat kadadosang:
  - ha. Mapuangkid utawi tan tedun ngayah luire :
    - 1) Ritatkala mapawangunan utawi nasarin. ngerabin sanggah, piasan, bale daja, bale dangin, bale dauh, klumpu miwah pawon;
    - 2) Ritatkala nangun yajnya, kaluwasan masengker déwasa, ngotonin, nyakapang, masangih, mapasaksi, kicalan putra, sakit lan patirtan;
    - 3) Maluasan utawi ngaluang;
    - 4) Kapialang, luwiré : sungkan, matepetin, kalayu sekaran, lan sakancan punika;
    - 5) Matepetin lan siosan, matepetin selami asasih;
    - 6) Mapuangkid sangkaning sungkan, mangda masadok ring prajuru;
    - 7) Kabandha ring genah mekarya sane tan presida ninggal;
    - 8) Keni dedauhan saking guru wisésa.
  - na. Nyada mapiteges wusan ngayah, risampun mayusa 65 (enem dasa lima) warsa utawi lintang;
  - ca. Mogpog utawi ngetut ayahan antuk artha brana (jinah), majeng ring krama desa sane magenah ring dura desa adat manut pararem,;
  - ra. Nyudi patajuh utawi panyeledihi wiadin nyuksukin ayah ring kulawarga utawi krama tiosan sane sampun munggah daha truna tur sampun mayusa 17 (pitulas) warsa;
2. Swadharmaning krama adat, luwiré :
  - ha. Satinut ring sadaging awig-awig, pararem lan pasuara dèsa adat;
  - na. Tan maren sareng mautsaha, mangda désané prasida nyujur patitis ring ajeng;
  - ca. Sayaga sareng nitenin kasukertan dèsa adat;
  - ra. Keni paturunan, peson-peson lan ayahan mamungkul;
3. Swadharmaning krama tamiu inggih punika :
  - ha. Satinut ring tatiwak dèsa adat ngenanin indik ngupadi kasukertan dèsa adat sekala niskala;
  - na. Tan kéngin nungkasin kértiyasan dèsa adat.
  - ca. Patut masadok ring kelian banjar ritatkala narima tamiu ngantos lintangan ring 24 jam;
  - ra. Ngaturang ayah ring pahyangan lan punia manut babuatan lan perarem;
4. Swadharmaning tamiu, inggih punika :
  - ha. Satinut ring tatiwak desa adat ngenanin indik pawongan lan palemahan;
  - na. Tan kengin nungkasin kertiyasan desa adat;
  - ca. Patut masadok ring kelian banjar ritatkala narima tamiu ngantos lintangan ring 24 jam;

## Pawos 23

Kapatutan krama adat:

1. Kapatutan krama adat sakadi ring sor :
  - ha. Polih pasayuban saking desa;
  - na. Polih kasukertan miwah kasucian déwék, parhyangan miwah karangnyané;
  - ca. Polih kasukertan padruwén nyané sowang-sowang;
  - ra. Ngamedalang pikayun ritatkala wenten paruman ring desa sane mabuat;
  - ka. Dados prajuru ring banjar utawi desa;
  - da. Polih pamutus saking prajuru ritatkala wenten wicara;
  - ta. Polih laluputan manut pararem;
  - sa. Drede - atuang ring desa lan satinut ring tatiwak désané ngupadi kasukertan sakala niskala.
  
2. Kapatutan krama tamiu :
  - ha. Patut madana punia ring desa utawi banjar adat, manut pararem;
  - na. Polih pasayuban marupa pitulung rikañjekan katibén pañcabhaya;
  - ca. Polih pamutus saking prajuru ritatkala wenten wicara;
  - ra. Satinut ring sehananing tetiwak banjar lan désané ngupadi kasukertan sakala niskala lan nénten tungkas ring kerthin banjar lan desa
  
3. Kapatutan Tamiu :
  - ha. Patut polih pasayuban marupa pitulung rikañjekan katibén pañcabhaya;
  - na. Polih pamutus saking prajuru ritatkala wenten wicara;
  - ca. Satinut ring sehananing tetiwak désané ngupadi kasukertan sakala niskala lan nénten tungkas ring kerthin banjar lan desa.
  
4. Silih tunggil krama désa lan tamiu tan kadadosang ngajak wong wadon tuna susila ngranjing miwah ngarerep ring wawidangan désa adat, sapisira ugi sané piwal, keni pamidanda manut pararem;
  
5. Krama desa lan tamiu tan dados makta, nganggén, madruwé, bilih – bilih ngadol sarana sané tan manut ring uger-uger guru wisesa, sapisira ugi sané piwal tur kabuktiyang, keni pamidanda manut pararem;
  
6. Sinalih tunggil krama désa lan tamiu sané merebat utawi mayudha ring wewidangan désa buduk bilih – bilih jantos kanin ngewetuang rah napi malih jantos lampus, patut katuréksin lan kasulurin olih prajuru désa, tur keni pamidandha pemrayascita ring désa, manut perarem;
  
7. Krama Adat lan Tamiu sane jagi ngwangun Parhyangan utawi genah ibadah ring wewidangan desa buduk patut sadok tur polih pamikukuh ring Prajuru Desa Adat medasar antuk paruman désa, yan tan sekadi punika, tan kalugra manut perarem.

## Pawos 24

Wusan dados krama désa :

1. Sangkaning :
  - ha. Séda utawi lampus;
  - na. Pinunas ngaraga;
  - ca. Kanorayang, malantaran piwal ring awig-awig miwah pararem désa, utawi tan satinut ring pituduh prajuru sajeroning indik nyupat sikian, minakadi nénten prasida ngeséhin prawertin nyane;
  
2. Sang wusan dados krama désa taler kabawos wusan mabanjar, mangda nenten kabawos empak ngulanting;
  
3. Sang wusan dados krama désa tan polih pah-pahan druwén désa utawi banjar, tur tan polih pasayuban malih sajeroning ala-ayu;

4. Sang kanorayang dados malih tedun makrama désa yaning sampun maséh parisolah ipun tur malarapan antuk katerima ring banjar adat sowang-sowang, maweweh pamogpog manut pararem;
5. Pradé sangkaning rahayu, polih likita bukti patilar saking prajuru desa;

### **Pawos 25**

Ayah-ayahan krama.

1. Satunggil krama, manut paetangannyane, keni ayah-ayah sekadi ring sor :
  - ha. Ayahan utama inggih punika ayahan sane kamargiang olih krama sane ngamargiang swadharma ekajati miwah dwijati;
  - na. Ayahan ngarep inggih punika ayah sane kamargiang olih krama sane dados krama adat, sane jangkep alaki rabi. Ayahan ngarep mapiteges paturunan, peson-peson miwah ayahan mamungkul;
  - ca. Ayahan balu inggih punika ayahan sane kamargiang olih krama balu makadi ring sor :
    - 1). Balu makrambian, keni ayah lan urunan aparo;
    - 2). Balu ngempu, keni ayah lan urunan aparo;
    - 3). Balu ngatung, tan keni ayah, nanging keni urunan aparo;
    - 4). Balu ngelisting, luput manuk;
  - ra. Ayahan daha truna : luput manuk ring papeson kemawon keni ayahan gotong royong manut babuatan;
2. Soang-soang ayahan punika wantah kamargiang siki kemanten, manut kawentenan krama inucap;
3. Sahananing krama sané sampun munggah daha truna, soang-soang patut sareng ngayah sané kawastanin ayah daha truna;
4. Ayahan daha truna punika kapupulang sajeroning Sekaa Truna;
5. Sekaa Truna punika patut wénten ring soang-soang banjar adat;
6. Krama adat wenang nyada ayahan, sané mateges mademang ayahan, yan sampun kapastika, luwiré :
  - ha. Sungkan tahunan;
  - na. Yan sampun madruwe pangentos utawi panyeledihi;
  - ca. Risampun mayusa 65 (enem dasa lima) warsa;

### **Pawos 26**

Tata titi krama desa utawi tamiu, sane nampi krama tamiu utawi tamiu:

1. Krama desa utawi tamiu sané nampi krama tamiu utawi tamiu jantos marerepan:
  - ha. Mangda masadok ring kelian banjar, arahina saking ngawit marerepan ring genah sang narima;
  - na. Yaning krama tamiu utawi tamiu punika madunungan rawuhing asasih, kelian banjar patut nuréksain kabuatan nyané madunungan, kādungang ring likita sané ninasang kabuatan ipuné;
2. Yening kabuatan nyané tan manut ring sané katinasang, kelian banjar wenang ngawaliang krama tamiu utawi tamiu punika;
3. Yaning krama tamiu utawi tamiu punika jenek rawuhing nem sasih taler durung kasadokang ring prajuru desa, krama desa sané nampi lan tamiu punika keni pamidanda manut pararem;

### **Palet 2 Pamucuk Desa**

## **Pawos 27**

Pamucuk Desa Adat inggih punika :

1. Sabha Desa.
2. Kertha Desa.
3. Prajuru Desa.

### **Sabha Desa**

#### **Pawos 28**

1. Sabha Desa, inggih punika paruman desa sane taler kabawos paruman agung desa adat sane kamiletin antuk krama maka sami miwah prajuru adat sami sane matatujon pacang nepasin sahananing wicara sane mawiwit saking awig-awig lan sane mapakilitan ring tata adat, agama, budaya miwah sahananing pidabdab pewanungan ring desa adat sane muatang pamutus ring sajeroning paruman agung;
2. Manut ring dresta sane manggeh ring adat, sahananing pamutus-pamutus sane kamedalang tur kamanggehang ring desa adat dumogi panglaksanaan adat-istiadat prasida mamargi ajeg patut kaputusan ring sajeroning paruman desa sane mawasta Sabha Désa;

### **Kertha Desa**

#### **Pawos 30**

1. Kertha Desa inggih punika genah prajuru desa lan krama desa adat nunas dharma tatimbang yening wenten nepasin daging awig-awig;
2. Swadharma Kertha Desa, wenang mapaica saluwiring dharma tatimbang lan pinaka pemutus ring prajuru desa, makadi :
  - ha. Indik prajuru desa sane singsal ngamargiang awig – awig;
  - na. Indik krama desa sane pacang nguwah nguwhin awig-awig desa adat;
  - ca. Indik wenten wicara ring desa adat sane kasungguh perkara;
3. Kertha Desa patut ngicenin dharma tatimbang lan ngawantu prajuru desa lan krama desa yening wenten pikobet indik pamargin awig-awig;
4. Ritatkala wenten prajuru desa sané kabuktiang nimpang ring laksana tan kadi linging awig – awig, kertha desa kedadosang nibakin pemutus ring prajuru punika medudonan antuk pengeling – eling ping 3 (tiga) yéning nenten taler i prajuru amari wikrama patut kenorayang sesampun kacumpuin ring paruman krama desa.
5. Kertha Desa patut nyungkemin sahananing pengrencana prajuru desa saking ngarincikang kriya nagata, pewanungan lan padrewén desa, indik parhyangan, pawongan taler pelemahan sané matetujon ngardi kasukerthan;

### **Tata cara Ngadegang Kertha Desa**

#### **Pawos 31**

1. Kertha Desa mawiwit saking prajuru desa lan angka krama soang banjar sane kasudi olih Bendesa Adat Buduk, akéh nyané nganutin kawigunan;
2. Sane dados kadegang Kertha Desa luwirnya :
  - ha. Mawiwit saking krama ngarep utawi sané sampun lepas ring ayah, naenin dados prajuru desa, utawi sinanggeh pamucuk désa sané pascat ring sastra agama;
  - na. Waged ring hukum adat, agama lan hukum nasional;
  - ca. Mayusa sakirangnya 45 warsa tur sampun marabian;
  - ra. Kapikukuhin olih Bandesa Adat turmaning Bandesa Adat pinaka pemucuk.
  - da. Suwénnyane dados Kertha Desa 5 (limang) warsa utawi sinarengan ring Prajuru Desa;

3. Pemucuk utawi angga kertha desa sane medruwé paiketan ring wicara sane kebawosang, néntén kalugra miletin utawi nyarengin ring saparindik bebawosan wicara inucap, yening nenten sangkaning kaulemin;
4. Ritatkala wenten wicara sane mapaiketan ring angga pemucuk kertha desa, sane dados ngentosin inggian jagi nitenin wicara, inggih punika sané pinih werdha utawi sinanggeh waged ring hukum adat lan agama;

### **Prajuru Desa**

#### **Pawos 32**

1. Sane kasinanggeh prajuru desa inggih punika :
  - ha. Bandesa;
  - na. Patajuh;
  - ca. Panyarikan;
  - ra. Patengen;
  - ka. Kasinoman desa;
  - da. Pacalang;
2. Prajuru Desa lan Banjar patut :
  - ha. Mawiwit saking krama ngarep;
  - na. Waras lan tan ceda angga;
  - ca. Maparilaksana becik lan tan nahenin katibakin danda utawi kasisipang olih Guru Wisésa.
  - ra. Uning nyurat utawi ngwacén aksara Latin lan Bali, sadhu, waged ring sastra agama, tur mawibawa.
  - ka. Nenten ngerangkep linggih ring sejroning Partai Politik;
  - da. Nenten dados nyarengin ring sakalwiring kampanye partai;
  - ta. Sumanggup dados prajuru tur susatya jaga nglaksanayang swadarmaning pinaka prajuru, tur mangda madéwa saksi ring Pura Désa.

### **Tata cara Ngadegang Prajuru Desa**

#### **Pawos 33**

1. Tatacara Ngadegang Prajuru Desa :
  - ha. Soang banjar dados ngamedalang 1 (siki) calon bandesa mawiwit saking krama ngarep;
  - na. Ngadegang prawartaka pemilihan, kamanggalaning antuk kertha desa, prajuru desa sane lawas, kawantu olih kelian utawi prajuru banjar sane kasudi;
  - ca. Calon saking prajuru banjar kaselehin antuk prawartaka, raris kapastika wenten 3 - 5 calon Bandesa Adat;
  - ra. Pemilihan kamargiang ring soang – soang banjar adat, soang-soang kelian banjar patut nitenin lan nureksain pamargi pemilihan bandesa inucap;
  - ka. Calon sane kacawis paling makweh sane jayanti;
  - da. Bandesa wenang nyudi pangabihnyane;
2. Prajuru Desa kādegang 5 warsa apisan olih paruman agung desa adat;
3. Prajuru sané wawu kepilih kaupasaksiang lan nunas pawintenan ring Pura Kahyangan Tiga utawi ring Pura Bale Agung;
4. Sajawaning wénten parindikan sios, sang sampun puputing panumaya dados prajuru, kéngin kapilih malih;
5. Prade bandesa adat mararyan, sadurung panumayan ipun, swadarman nyane kamargiang olih patajuh nyane rawuh puputing panumaya;

### **Pawos 34**

1. Ritatkala ngamargiang kasukerthan desa adat, bandésa kawantu olih :
  - ha. Patajuh, pinaka wakil bandésa;
  - na. Penyarikan, pinaka juru nyurat;
  - ca. Patengen, pinaka jururaksa padruwén désa;
  - ra. Kelian-kelian banjar adat;
  - ka. Kasinoman pinaka juru arah lan ngewantu prajuru desa;
  - da. Pecalang sane nreptiang pamargi ritatkala wenten karya adat, budaya lan agama Hindu;
  - ta. Prajuru ring soang-soang pura panyiwian desa;
2. Ritatkala ngénterang kasukertan ring niskala, bandésa patut nginggilang dharma agama tur mangsinggihang Sang Sadaka, Pamangku Kahyangan Tiga miwah kahyangan desa tiosan;
3. Indik tata titi ngadegang pecalang, swadarma lan patitis ipun, kamanggehang manut pararem;

### **Pawos 35**

1. Swadharmaning Bandésa Adat, inggih punika :
  - ha. Ngénterang paruman-paruman désa adat;
  - na. Ngénterang panglaksanaan sadaging awig-awig miwah pamutus-pamutus krama désa, sané sinanggeh pararem;
  - ca. Ngaraksa miwah nudonang tata-titiné migunayang druwén désa;
  - ra. Nuntun saha ngénterang krama désa rawuhing warga désa sami, ngupadi kasukertan sekala lan niskala;
  - ka. Nuntun saha nyaksi upacara panyangaskaraning kahuripan sané mabuat;
  - da. Nuntun saha ngénterang warga désa, nginggilang Agama Hindu, kasucian kahyangan, palemahan, pawongan, miwah tata-titiné migunayang sétra;
  - ta. Mawosin miwah niwakang pamutus marep ring wicàra krama;
  - sa. Maka duta désa adat, matemuang babawos ring sapisira ugi;
  - wa. Ngarincikang kriya nagata nyabran awarsa utawi manut kawigunan, anggén niti swadarma ngelaksanayang dharma agama, ngerajegang kesucian kahyangan tur kasukerthan krama lan désa;
  - la. Lan sané séwosan sané wénten pakilitannyane ring désa adat.
2. Tata-titiné ngalaksanayang swadharma inucap ring ajeng, tan maren patut adwaya ring kertha desa tur satinut ring daging awig-awig, pararem, dresta miwah pamutus paruman krama désa adat;
3. Panglaksanané ring ajeng patut kasobyahang ring désa adat, kapungkur ipun;
4. Sumakuta miwah sumanggup natak pamutus paruman krama désa adat, ngenanin swadharman sowang-sowang prajuru;

### **Pawos 36**

Swadarman Patajuh inggih punika pinaka pengabih tur penyeledii, ngawantu bandesa ri sehananing pengerencana lan pemutus ngenanin pemargin adat ring parhyangan pawongan lan palemahan;

### **Pawos 37**

Swadarman Penyarikan inggih punika ngawantu bandesa ngaryanin saluir sewalapatra, ngilikitayang padruwén desa tur nyuratang saluiring pamutus pangrawos desa ring paruman;

### **Pawos 38**

Swadarman Patengen inggih punika ngawantu bandesa ngaryanin utawi ngarincikang sakaluwir pangranjing miwah pamedal jinah desa adat, ngupapira tur mikukuhin maka padruwen desa adat;

### **Pawos 39**

Swadarman Kasinoman Desa, pinaka juru arah tur ngewantu bandesa lan nyiagayang pemargin upakara yajnya ring pura kahyangan tiga minekadi ring pura desa, puseh lan dalem nyantos mareresik;

### **Pawos 40**

Swadarman Pecalang Desa ngawantu bandesa nreptiang désa lan sehanan pamargin upacara yadnya, dharmaning Agama lan Dharmaning Negara;

### **Pawos 41**

Patias utawi olih-olihan lan laluputan Pamucuk Désa Adat sareng Prajuru Adat, manut pararem;

### **Pawos 42**

1. Wusan dados Pamucuk Désa Adat, sangkaning :
  - ha. Padem/lampus/seda;
  - na. Pinunas ngaraga;
  - ca. Swadharman nyane sampun puputing senger;
  - ra. Kawusang utawi kanorayang olih krama désa duaning iwang pamargi, tan kadi manggehang daging awig – awig, manawi nilar sesana patut keni pamidanda manut perarem;
2. Ngentosin, nguwusang utawi nganorayang pamucuk désa adat, patut kamargiang sajeroning paruman agung désa adat;

### **Pawos 43**

Patias utawi olih-olihan prajuru desa luire :

1. Prajuru dèsa adat luput pepeson, reramon, lan artha brana ka dèsa.
2. Kelihan Dèsa Adat utawi Bandesa Adat tan kengin malih kadadosang prajuru ring banjarnyanè.
3. Kelihan Adat utawi Bandesa Adat luput pepeson, reramon lan artha brana ring banjarnia soang-soang ritatkala wenten karya dèsa.
4. Miwah petias sanè tiosan manut pararem.

### **Palet 3**

### **Indik Kukul**

### **Pawos 44**

1. Kukul ring Dèsa Adat Buduk wènten 5 soroh :
  - ha. Kukul Dèsa magenah ring Pura Dèsa.
  - na. Kukul Pura Kahyangan Tiga lan sanè lianan sanè magenah ring pura soang-soang.
  - ca. Kukul banjar adat magenah ring banjar adat.
  - ra. Kukul sekaa taruna magenah ring banjar adat.
  - ka. Kukul sekaa- sekaa magenah ring prajurun sekaa soang-soang.
2. Tabuh tetepakan kukul dèsa / banjar pastika masiosan tetujon luire :



- ha. Tengeran tedun ngayah, tengeran paruman, suaran kulkul dabdab manut dresta.
- na. Tengeran wali utawi patirtan di pura dung-ding, ngawit pujastawan para mangku / sang sulinggih. Rikanjekan upacara ngrupuk tan kadadosang mada-mada suaran kulkul sanè sampun kabacak sajeroning awig-awig.
- ca. Tengeran kapanca bhaya, suaran ipun bulus, mekadi:
  - 1) Jiwa bhaya, suaran kulkul bulus mawali-wali.
  - 2) Gni bhaya, suaran kulkul bulus tan pepegatan.
  - 3) Èr bhaya, suaran kulkul atulud bulus;
  - 4) Artha bhaya utawi kamalingan lan Duracara ring Agama suaran kulkul bulus tigang tulud.
  - 5) Bayu bhaya utawi angin ngelinus suaran kulkul atulud bulus;
  - 6) Riwusan kulkul bulus, yen wenten suaran kulkul tabuh alon, nyiarang wicaranè sampun purna.
- ra. Lindu bhaya utawi linuh, tengeran suaran kulkul ngompang
- ka. Tengeran sinalih tunggil krama desa kalayuan utawi seda, tabuh kulkul ping tiga matuludan
- da. Tengeran silih tunggil krama desa adat mijil, tabuh kulkul ping pisan.
- ta. Tengeran sinalih tunggil krama desa adat kaambil utawi nganten, tabuh kulkul ping pat,

### **Pawos 45**

1. Kulkul dèsa utawi banjar miwah sekaa-sekaa tan wenang katepak yening tan sangkaning pituduh prajuru sajawaning tengeran kapanca bhaya manut ring ajeng.
2. Sang pecak nepak tan sangkaning pituduh, patut digelis atur supeksa maka buatan panepake. Yan tan asapunika kadanda manut pararem. Asapunika taler pamidanda yan nepak tan anut wiguna.
3. Prade wenten nepak kulkul anut tengeran kapanca bhaya, mawastu ngamedalang krama, kasujatine tan wenten kapanca bhaya, wenang sang nepak kadanda manut pararem.
4. Tengeran suaran kulkul pradè wènten ke panca bhaya ring sawewidangan Dèsa Adat Buduk patut kasaurin olih suaran kulkul banjar sané siosan nyihnayang kapanca bhaya.
5. Yening wènten panca bhaya ring dura Dèsa Adat Buduk, banjar sanè pinih nampek ring genah panca bhaya inucap wenang nyuarang kulkul.
6. Tengeran kapanca bhaya patut katedunin antuk sahanan ayahan saha gegawan manut rupan bhayanè.
7. Kulkul sekaa tan wenang matehin sukat miwah nyaurin tengeran kulkul dèsa utawi banjar. Pradè mamurug keni pamidanda manut pararem

### **Palet 4**

### **Indik Paruman**

### **Pawos 46**

1. Paruman ring Dèsa Adat Buduk wenten 5 (limang) soroh, inggih punika :
  - ha. Kertha Sabha Dèsa, inggih punika paruman sanè pinih maorat, sane nibakang indik kasukertan jagat. kamiletin olih prakanggè dèsa adat jangkep luiè: pamucuk desa / panglingsir/ sesepuh dèsa, prajuru dèsa, para pepupulan dèsa, Kelihan Banjar Adat. saha utusan soang-soang banjar sakirang ipun kalih diri.
  - na. Upa Sabha Dèsa, inggih punika paruman madia sanè nibakang indik pangrencana utawi pidabdab mautsaha ngwangun dèsa adat.
  - ca. Paruman prajuru utawi pamucuk-pamucuk dèsa;
  - ra. Paruman banjar.
  - ka. Paruman papupulan utawi sekaa – sekaa;
2. Paruman dèsa kawèntenang nangken sasih ka dasa utawi segelisé dasa rahina sesampun tawur kesanga lan nemoning wènten wicara sanè mabuat, utawi padgata kala manut kawigunanya.
3. Paruman banjar manut pararem banjar soang-soang.

4. Paruman prajuru kawèntenang padgata kala manut kawigunania.
5. Paruman pepupulan kalaksanayang manut padgata kala, rikala wentèn bebawosan sanè mabuat.
6. Paruman desa utawi banjar madudonan sakadi ring sor :
  - ha. Prasida lumaksana risampun katedunin antuk sang patut ngamiletin paruman, kamanggalanin antuk tengeran kulkul miwah mabusana adat, saha tan kalugra makta gagawan lan tan maren ngarcana ring Ida Bhagawan Panyarikan maka sarana Widhi Widhana Cane;
  - na. Maka sarana jagi pangawit kalaksanayang sep-sepan saha ri wusan nyacah krama kamargiang nawur dadosan gung alit ipun manut pararem;
  - ca. Tan kalugra ngawetuang suara ghora utawi byuta prade wenten makadi punika keni pamidanda bea pacamil makadi dandaning nguman-uman ring sabha;
  - ra. Pamutus babawos briyuk sapanggul (ingkup) punika sane kamanggehang;
7. Prade daging paruman tan kacumponin mangda prajuru desa utawi banjar ngilikang babawos, saha pamutusnyane mangda kararemang antuk krama desa utawi banjar, samaliha prade tan prasida kasungkemin rawuh ping tiga, prajuru banjar wenang nunas bawos ring Kertha Désa manut undagan luire : kamanggeh paingkupan prajuru, ngraris panglingsir, panguntat paruman;

#### **Pawos 47**

1. Ring sahanan paruman tan maren kariinin (kamanggalanin) antuk pangarcana ring Ida Sanghyang Widhi Wasa utawi Bhagawan Panyarikan saha widi widana (canang utawi cané).
2. Sajeroning paruman desa, bandesa adat patut nyiarang pamargi ngenterang desa, pamekas nganinin indik:
  - ha. Munjuk lungsuring pakraman saha ayah-ayah, sulur artha brana druwén desa;
  - na. Pangrencana prajuru nganinin usaha desa kapungkur;
3. Pamutus paruman desa sinanggeh pararem maka pamitegep pamargin awig-awig;

#### **Pawos 48**

1. Sangkepan prajuru desa kawenangang jagi ngrincikang pangerencana usaha desa adat, pikolih desa adat tur usaha kapungkur sané maka padruwén desa;
2. Sangkepan prajuru tan kawenang ngawedalang tategenan ring krama sadurung kaingkupin antuk krama desa;
3. Pamutus sangkepan prajuru ngawetuang paswara, maka pidaging pituduh sang ngawiwenang ngonékang pecak pararem krama desa;

### **Palet 5 Indik Padruwen Desa Pawos 49**

1. Padruwen Desa Adat Buduk sakadi ring sor :
  - ha. Kahyangan desa, luire :
    - 1) Kahyangan Tiga;
    - 2) Balé Agung;
    - 3) Pura Melanting;
  - na. Wantilan;
  - ca. Margi, rurung, basang utawi sempadan tlabah, lan tanah balè banjar;

- ra. Setra-setra apelebahan kepeah dados kalih pelebahan luire setra bebajangan lan setra ageng;
- ka. Palabha pura, carik utawi tegal malinggah.....m<sup>2</sup>;
- da. Lelanguan, minakadi tetabuhan lan ilen-ilen padruwen bebanjangan/tempekan luire
  - 1) Gong lan Angklung.
  - 2) Gong Bebarongan
  - 3) Ilen-ilen wali pura; rejang, pendet, Baris Gede
  - 4) Likita-likita, luwire pipil krama, awig-awig, paswara utawi pararem lan sane tiyosan.
- ta. LPD;
- sa. Pasar Desa Adat;
- wa. Usaha Desa Adat
- la. Miwah sane lianan;

- 2. Olih-olihan Desa Adat Buduk luire :
  - ha. Olih-olihan saking palaba pura;
  - na. Olih-olihan saking LPD, Pasar Desa Adat Buduk lan Usaha Désa Adat
  - ca. Urunan krama desa;
  - ra. Paica saking guru wisesa;
  - ka. Dana punia tiosan, sane patut;

### **Pawos 50**

1. Prajuru desa wenang ngétangang pamupon laba pura lan sapa nunggilan druwen desa manut sekadi perarem;
2. Prajuru Désa wenang ngétangang indik krama sané mapikayun jagi ngadol tanah warga maka tetamian utawi warisan manut perarem;
3. Désa Adat ritatkala jagi nincapang pikolih anggén nyujur kasukerthan desa, prajuru désa dados nganggén lan mewangun ring pelaba druwén désa, sane merupa tegalan utawi sawah medasar antuk kacumponin ring krama desa;
4. Désa Adat dados amrih dana pinaka punia saking sahananing usaha ring wewidangan Desa Adat Buduk, anggén ngupadi kasukerthan lan kerahajengan desa adat Buduk, manut perarem;
5. Pikolih lan pamupon nyané kanggen prabeya piodalan lan sakeluwuring wawangunan ring pura;
6. Désa Adat kapatut madruwé minekadi:
  - ha. Pesraman, makasedana anggén nincapang pangaweruh utawi kewagedan krama
  - na. Baga – baga seni budaya pinaka pelestari budaya lan maka dūta Desa Adat ri sejroning ngayah utawi pacentokan;
7. Nyabran pasangkepan desa, prajuru pangamong druwen desa ngawentenang atur saparindik munjuk lungsur padruwén desa ring krama desa;
8. Prajuru desa patut ngawéntenang panureksa ring sehanan padruwen desa nyabran awarsa, minekadi Pasar, LPD lan sane tiosan sane mapaiketan ring pikolih desa adat.
9. Satunggil pamucuk sane kasudi nitenin usaha padruwén désa adat patut ngawentenang kriya nagata nyabran awarsa pinaka niti pemarginnyané, kariinin antuk unjuk lungsur pemargin utsahané lintang ring prajuru lan pemucuk desa, sadurung kesobyahang ring krama desa.
10. Sakaluwir druwen desa patut wenten likitan nyané;
11. Tan kalugra ngewala bilih – bilih ngadol utawi ngésahang druwén desa yan tan kasungkemin antuk krama desa;

### **Palet 6 Indik Panyanggran Banjar**



### **Pawos 51**

Krama desa rikala karya suka-duka, patut kasanggra antuk banjar luwire;

1. Prade ngawangun Catur yajnya minekadi Pitra yajnya, Manusa yajnya, Rsi yajnya lan Dewa yajnya manut pinunas sang mayajnya;
2. Pangrombo utawi karya gotong-royong krama nganti ping tiga, salangkungan punika patut katuran pangu;
3. Pangu rikala pitra yajnya kanutang ring abot yajnya, lan manut perarem;

### **Palet 7 Indik Pawiwahan Pawos 52**

1. Pawiwahan inggih punika patemoning purusa pradana malarapan panunggalan kahyun suka citta kadulurin upasaksi sekala-niskala;
2. Pamargin pawiwahan luire :
  - ha. Pepadikan, kamanggala antuk pakrunan;
  - na. Ngarorod, ngrangkat rihin wawu kakrunayang;
  - ca. Pada gelahang
3. Pidabdab sang pacang mawiwaha patut :
  - ha. Sampun manggeh daha truna (prasida nginutin Undang-Undang Perkawinan);
  - na. Sangkaning pada rēna lan trēsna sih, (tan kapaksa);
  - ca. Kasudiang prade pangambilane sios agama;
4. Pamargin pawiwahane mangda nganutin Undang-Undang Perkawinan saking guru wisesa;
5. Yan wènten anak istri krama Dèsa Adat Buduk, karangkatang olih sang sapa sira ugi, yan kantos arahina ring awengi saking dina matinggalè saking jumah tan wènten pasadok, patut sang maduè wirangè masadok ring prajuru desa adat, mangda ngamargiang saserepan.
6. Yan wènten sinalih tunggil saking dura dèsa, pacang muput rangkat kawewengkon Dèsa Adat Buduk, sang maduè anak istri patut nunas pasaksi ring prajuru dèsa / banjar.
7. Yan wènten anak istri saking Dèsa Adat Buduk mrangkat, ring sampunè puput rangkat punika, raris nongkol ka umah wirang istrinè, patut ngaturang panebas kania ka dèsa / banjar adat, gung arta manut pararem.

### **Pawos 53**

1. Pawiwahan sane kapatutang ring desa, sakadi ring sor :
  - ha. Sampun kamargiang pabiakala utawi kasaksiang sekala-niskala;
  - na. Wenten pasaksi prajuru sane mapakelingan utawi ngilikitayang pawiwahan;
2. Parabian sane tan manut kadi ring ajeng sinanggeh tan patut;

### **Pawos 54**

1. Sapa sira ugi pacang ngawarangan pakulawarganya patut masadok ring prajuru, salantur nyane prajuru maritatas, manut tan manut pamargi parabiane;
2. Pamargin papadikan manut desa mawacara;
3. Pradé Ngerorod utawi Ngrangkat patut:
  - ha. Reraman lanange ngawentenang pamalaku antuk duta saksi sakirangnya 2 (kalih) diri;

- na. Pagenahan anténé tan kengin ring pakubon sang lanang sedereng mabiakala;
4. Sajeroning pakrunan utawi panglukuan patut :
    - ha. Kamanggala antuk geng pangampura, majeng ring reraman wadone;
    - na. Kaigumang bawos indik idih-pakidih utawi palegayan arep ring pasewakan sang ngidih saha dewasa pakrabkambeyane wekas;
    - ca. Kacihnayang indik kapurusa utawi prade santana rajeg kajejerang, kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang santana nyeburin;
    - ra. Prade tan terima, pejati pakrunan kamargiang jantos ping tiga;
  5. Pakrabkambéan mapiteges upacara tinas apadang (tinglas) mapikuren, duaning manut sakadi ring sor :
    - ha. Sajeroning kabawos ambe, kalaksanayang ring sekala niskala antuk sarana jejauman miwah pawidhi widhana :
      - 1) Jejauman pinaka ngambe utawi ngadungang kayun soang-soang pakulawargan wadonne;
      - 2) Widhi widhana pinaka pejati niskala nunas wadone ring pamrajan kamulannyane;
    - na. Sajeroning bawos kerab kambe palaksanane ring sekala :
      - 1) Antuk panyaksi krama banjar, duaning kakerabin manawi antuk tengeran kulkul;
      - 2) Pamekas panyaksi prajuru saha ngilikitaang;

**Palet 8**  
**Indik Santana**  
**Pawos 55**

1. Santana wenten kalih pawos, sane kaucap pratisantana miwah santana paperasan;
2. Pratisantana inggih punika santana sane metu saking pawiwahan kapatut;
3. Prade pawiwahan tan ngawetuang santana kengin ngidih santana madasar antuk upasaksi sekala niskala sane kawastanin santana paperasan;
4. Prade nenten kadasarin panyangaskara utawi antuk pawiwahan tan kapatut ngawetuang santana, mangda tan kawastanin pianak babinjat utawi astra;
5. Santana rajeg inggih punika, pratisantana wadon (pradana) sane kamanggehang lanang (purusa) tur risampun ngalaksanayang pawiwahan nyeburin;
6. Sang sane karsayang santana rajeg inucap mawiwit saking :
  - ha. Pratisantana wadon tunggal utawi silih sinunggil pratisantana wadon yaning makasami pratisantana wadon;
  - na. Sampun kamanggehang dados pratisantana (purusa);
  - ca. Kapawiwahan kaceburin, kautsahayang antuk jadma sane māgama Hindu utawi jadma sane māgama siosan sane sampun ngalaksanayang pamarisudha raga utawi sudi wadani;
  - ra. Sane kamanggehang santana rajeg patut masadok ring prajuru banjar tur kelian banjar nyiarang ring banjar saha ngaturang ring prajuru desa adat;
7. Pradè wènten anak istri mobot tan wènten ngangkenin, sang adruè anak istri punika patut nyadokang ring prajuru banjar / dèsa. Prajuru patut ngutsahayang wicaranè mangda kulawarga istri punika ngutsahayang anak lanang sanè patut nyakapin.
8. Pradè durung putus wicaranè jantos raris medal anakè alit, patut sang istri punika keni pamidanda mrayascita banjar lan dèsa.

**Pawos 56**

1. Ngangkat santana anut dudonan patut maka cihna artha brana pamerasan sane kasaksiang sekala niskala;
2. Sapa sira ugi krama pacang ngangkat santana patut masadok ring prajuru adat sanistane asasih sadurung pamerasan;
3. Prajuru adat/bandesada adat sane kaangganing olih kelian banjar adat nyobyahang ring wawidangan banjar, manawi sang sapa sira ugi sane rumasa tan lila ring acarane punika, mangda masengker kalih wuku sadurung pamerasan masadok ring prajuru adat/bandesada adat;
4. Prajuru adat/bandesada adat digelis mawosin saha ngicenin pamutus nepek ring catur dresta miwah pararem;
5. Prade sulur pamerasan tan manut kecaping ajeng, prajuru adat /bandesada adat wenang ngandeg sang pacang ngamargiang pamerasan, saha ngicenin pamutus mangda kapuputang rihin babawosan manut sulur utawi wicaran nyane;

### **Pawos 57**

1. Paperasan sane kapatut ring desa risampun maka cihna :
  - ha. Widhi widhana pamerasan;
  - na. Kasaksinin antuk prajuru desa sane makelingang utawi ngilikitayang;
  - ca. Kasobyahang ring wawidangan desane;
2. Sane kapatut peras anggen santana kadi ring sor :
  - ha. Jadma magama Hindu;
  - na. Kulawarga saking purusa prade tan wenten kengin, dados saking wadon, yaning taler tan wenten wawu kengin sakama-kama (saking kahyun);
  - ca. Kautamayang saking waris pancer kapurusan;
  - ra. Silih tunggil mawiwit saking kulawarga tunggal sanggah utawi mrajan, paibon lan dadia, utawi ngambil anak tios sakewanten sane mġagama Hindu;
3. Kengin ngangkat santana langkungan ring adiri, lanang wiadin istri;

### **Palet 9 Indik Nyapihan Pawos 58**

1. Pawiwahan prasida kawusang malarapan antuk palas marabian utawi lampus;
2. Wusan mapikuren riantukan silih tunggil lampus mapiteges balu, makadi balu lanang wiadin istri;
3. Palas marabian inggih punika sangkaning mawiwit wicara kabawos nyapian;
4. Sang sane palas marabian patut atur supeksa indik pailikitan nyane rihin ring sang rumawos utawi Pengadilan Negeri wastu tinas apadang pamutus nyane kabawos nyapian, wawu prajuru adat nyobyahang kawentenan nyane ring desa adat utawi banjar adat, sakirangipun asasih saking palasnyane;
5. Sapa sira ugi krama dġsa sane sampun alaki rabhi mawicara sedurung mesadok ring guru wisesa (pengadilan) kapatut:
  - ha. Mesadok riyin ring prajuru pura penyungsungan kulawarga wawu lantur ring prajuru adat utawi dġsa.
  - na. Prajuru banjar utawi dġsa wenang nitenin tur nuntun kulawarga sane meduġ wicara mangde presida adung malih, santukan wantah swadharma prajuru ngewangun kulawarga krama sanġ adung, trepti miwah tresna sih;

6. Yan wenten silih tunggil krama Dèsa Adat Buduk ngrangkatang sapian, sadurung tigang sasih utawi 105 rahina, saking dina palase, patut sang ngrangkatang sapian punika keni danda manut pararem.
7. Yan wènten maraga pradana matinggal saking maraga purusa tur wènten magenah ring wirang maraga pradana laminipun lintang ring nem sasih, saha sampun polih panetes saking maraga purusa kantos ping tiga, patut katur ring prajuru dèsa, mangda kabawosang.

### **Pawos 59**

1. Yening pacang palas marabian sekadi ring sor :
  - ha. Patut mapisadok ring prajuru banjar adat;
  - na. Nawur prabea pasaksi manut perarem;
  - ca. Pabekel tatadan soang-soang kakuasa niri-niri lan warisan kakuasa antuk purusa;
  - ra. Ngupapira pratisantana manut swadarmaning sang meraga purusa;
  - ka. Sang meraga pradana kadadosang ngupapira pratisantana manut paiguman sang guru rupaka;
2. Prade riwekas sang palas kacihna adung, patut ngamargiang pawiwahan malih.

### **Pawos 60**

1. Sang balu kabinayang dados :
  - ha. Balu luh wit santana (santana rajeg) miwah balu luh boya sentana;
  - na. Balu muani kapurusa (wit sentana) kapurusa miwah balu muani nyeburin.
2. Swadarmaning balu inucap patut :
  - ha. Ngamanggehang patibrata tan kengin ngamargiang paradara, drati krama;
  - na. Nguwasayang waris gunakaya, tan dados ngadol, ngadeang, makidihang lan siosan punika, sajawaning sampun polih wak-wakan saking pianak utawi kulawarga pinih tampek saking kulawarga purusa prade okane kantun alit-alit;
  - ca. Kengin ngidih santana prade wenten pidabdab sadurung silih tunggil lampus, saha sampun polih wak-wakan saking kulawarga kapurusa;
  - ra. Kawenangang mawiwaha malih yaning sampun kalugra manut aksara ring ajeng.
3. Balu kaucap tan pageh sakadi ring sor :
  - ha. Drati krama utawi paradara;
  - na. Matilar saking pakubon tan pasadok jantos 6 (enam) sasih;
  - ca. Lempas ring swadarma lan tan prasida ngesehin solah maprawerti arep ring pituduh kulawarga purusa.

### **Palet 10 Indik Warisan Pawos 61**

1. Warisan inggih punika pustaka tetamian saking leluhurnia, artha brana saha ayah-ayahan ngupadi kasukertan sekala niskala saking kaluhuranya arep ring turunanya.
2. Karang sinanggeh warisan luire :
  - ha. Duwe tengah, karang kedi;
  - na. Pagunakaya, tatadan utawi jiwa dana, utang piutang.

### **Pawos 62**

1. Sane wenang ngewarisin, inggih punika :
  - ha. Pratisantana purusa.
  - na. Sentana rajeg;
  - ca. Sentana paperasan lanang utawi wadon sané sampun cumawis likitanyané.
2. Prade tan wenten sakadi ring ajeng sane sinanggeh ahli waris :
  - ha. Turunan purusa pernah ngunggahang makadi rerama lanang, pekak, selanturnia, rerama misan, mindon;
  - na. Turunan purusa pernah kasamping makadi kaponakan dimisan miwah mindon.
3. Swadarmaning ahli waris patut :
  - ha. Nerima, saha ngutsahayang tetamian pahan kaluhurannyane, makadi ngarempon marajan, pura, saha pangupakarania miwah ayah-ayahan pawaris;
  - na. Ngabenang pawaris saha ngalanturang upakara-upacara pitra yajnya;
  - ca. Nawurin utang-utang pawaris manut panglokika;

### **Pawos 63**

Mungging waris kawaris ring desa adat kamargiang makadi ring sor :

1. Risampun kalaksanayang pitra yajnya lan utang-utang pawaris buntas katawur, wawu warisan dados kaepah.
2. Para ahli waris sami polih pah-pahan.
3. Silih tunggil ahli waris kengin tan polih pah-pahan prade :
  - ha. Nilar kawitan lan sesananing Agama Hindu;
  - na. Alpaka ring guru rupaka;
  - ca. Sentana rajeg kesah mawiwaha lan pratisantana nyeburin soang-soang kabawos ninggal kadaton.
4. Pawaris kengin mawéwéh rikala maurip pinaka jiwa dana, tatadan utawi bekel, maka cihna pawéwéh tetep ring okane sane kesah mawiwaha.

### **Pawos 64**

1. Prade sajeroning pakulawarga wenten ahli waris langkungan ring adiri patut :
  - ha. Kawntenang paigum indik pedum waris inucap;
  - na. Yan tan prasida katunasang tatimbang ring prajuru desa;
  - ca. Prade taler tan wenten cumpu ring panepas prajuru desa, patut kadawuhang ring kertha desa prade taler tan kacumponin, kengin katunasang ring sang rumawos pamekas Pengadilan Negeri;
2. Prade karang inucap kaputungan, patut prajuru desa nibakang ring :
  - ha. Sang sinanggeh ahli waris manut pawos 62
  - na. Sang kengin anggen santana manut pawos 56 miwah 57
  - ca. Prade taler tan wenten cumpu ring panepas Kertha Désa, kengin kautsahayang ring sang rumawos pamekas Pengadilan Negeri.
  - da. Pradé kasuwén karang inucap nenten wénten pewaris sané pastika nyada ayah ring désa, Désa Adat dados naut lan mitegesin maka padruwén désa manut perarem;

## **SARGAH LIMA SUKERTA TATA PALEMAHAN**

### **Palet 1 Indik Karang, Tegal, lan Carik**

## **Pawos 65**

1. Krama sane ngamong tanah karang apalebahan, patut ngwatesin karang inucap antuk pagehan utawi tembok pinih utama sane marep ka margine mangda kanten asri;
2. Watese sisi kangin miwah sisi kaler patut kakaryanin olih sang medruwe karang, reh punika mawasta megaleng kaluan;
3. Prade kerasayang pagehan utawi tembok inucap ngelikadin, yening pada arsa pangadinnia, kengin watese nganggen pinget kewanten;
4. Asapunika taler yening wenten palemahan pura, pomahan, tegal, carik, miwah palemahan siosan sane kabebeng, sang madrue patut ngatengahang ke desa. Prajuru desa mangda ngutsahayang mangda polih margi sanistanyane mejimbar adepa belah utawi 120cm;
5. Pradé wénten krama sané jagi mewangun utawi ngenahang piranti maka sarana wewangunan nénten kalugra ngelikadin bilih – bilih ngantos nawenging krama sane ngelintang;
6. Prade wenten karang kaputungan wenang prajuru nibakang ring krama desa;
7. Yan wenten karang kaputungan wenang prajuru desa nibakang karang punika pertama ring turunan purusa pernah ngunggahang, ping kalih ring purusa pernah kasamping, ping tiga ring krama tiosan sane magama Hindu utawi dados padruwen désa adat;
8. Karang desa, karang paumahan, panegalan kaupapira sakala niskala manut Sastra Agama Hindu;
9. Tegal miwah carik patut magaleng kateben, pitegesnia batese sisi kulon miwah sisi kidul patut kakaryanin olih sang madue tegal miwah carik;
10. Bates inucap kengin antuk pagehan wiadin pracihna pal saking KPT;

## **Palet 2 Indik Setra Pawos 66**

1. Setra wawidangan desa adat pastika wates nyane;
2. Setra desa adat wantah setra krama desa adat sane magama Hindu;
3. Indik migunayang setra patut masadok ring prajuru desa;
4. Nenten kapatutang makarya undung-undung utawi gegumuk ring setra desa adat;
5. Muah sane tiosan sane mapakilitan ring setra lan pangupapirannyane

## **Pawos 67**

1. Sinalih tunggil krama desa utawi krama banjar tan kalugra :
  - ha. Ngalah-alah karang, tanah palaba pura, margi, tegal, miwah carik;
  - na. Ngalah-alah tanah tegak Kahyangan, setra lan sapanunggilan ipun;
  - ca. Ngembahang toya sane kebawos cem, wit saking glogor, badan wewalungan, pasiraman kakus, pawaregan, utawi usaha sapanunggilania ka tukadé, pakarangan utawi ka paumahan anak lian lan ka marginé;
  - ra. Ngentungang wangkén wewalungan ka tukade utawi ka pakarangan krama sios bilih – bilih karang suci;
2. Prade wenten kadi ring ajeng (1) keni pamidanda :
  - ha. Patut ngwaliang sane kalah-alah miwah danda manut pararem;

- na. Sajaba danda kadi dandaning wiwit (Ha) ring ajeng maweweh panyangaskara tanah Kahyangan sane kalah-alah;
- ca. Patut nyampetin utawi ngaryanang pamargin toya sumeken;
- ra. Patut nanem wangke inucap;

**Palet 3**  
**Indik Papayonan**  
**Pawos 68**

1. Ngawit nanem pepayonan patut adepa agung (2,5 meter) ngajeroang saking wates;
2. Tan kalugra wit taru :
  - ha. Mentik sajeroning wates
  - na. Nglintangin wates, bilih-bilih mawastu pacang mayanin kapisaga;
3. Prade wenten pepayonan sinanggeh mayanin, sang kajerihan patut atur sepeksa ring prajuru tur risampun kaparitas, mituduhin sang nruenang wit munggul utawi sanistane nyepat gantungin.
4. Yan wenten papayonan ngungkulin palemahan anak sios, sane ngawinang tiyeb, tampyas, ngrobodin, asing kaungkulan patut ngatengahang ka desa. Prajuru desa maritatas saha mituduhang sang madruwe mangda ngrancab, nekteb utawi ngrebah. Yan jantos pang tiga pituduh desane tan kalingu, wenang katiwakang danda sang anikel tuduh, gung artha manut pararem. Kekayonan punika prasida karebah antuk desa picundangan.
5. Sane keni pamidanda panyangaskara saha prabea manut pararem, wewangunan sane karubuhin :
  - ha. Sang nruenang wit sinanggeh mayanin, ngrubuhin wewangunan krama tios.
  - na. Sang notor, munggul utawi ngrebah taru, prade pungkut ngrubuhin wewangunan krama tios;
  - ca. Panyangaskara inucap sanistane prayascita jangkep, tur mecikang sane karusak;

**Palet 4**  
**Indik Wawalungan**  
**Pawos 69**

1. Sane kinucap wewalungan, sekancan buron suku pat sane kapiara sakadi bawi, banteng, kambing, kebo, misa, jaran miwah sapuninggilan ipun. Taler watek mekampid sane kapiara sakadi ayam, itik, angsa, dolong, miwah sabacakan ipun.
2. Sahanan krama desa sane miara sakaluiring wewalungan patut sayaga nitenin, negul utawi nglogor mangda tan ngrusak karang utawi pabianan krama siosan, bilih-bilih jantos ngeranjing ngletehin kahyangan.
3. Sahananin krama desa sane miara wewalungan tan dados ngeluanin Pura, Merajan, Sanggah penyanding bilih – bilih ambunyané kekantenan kawon ring krama tios:
4. Prade wenten sakadi ring ajeng, sang katiben patut malungguhang ring sang madrebe wewalungan, nglantur nyadokang ring prajuru desane mangda katiwakin pamidanda prabea lan pamarayascita manut pararem.
5. Asapunika taler krama desa lan dura désa nenten kapatutang maboros paksi, nuba ulam, lan sapanunggilan ipun, yan prade wenten sane mamurug patut katiwakang danda manut pararem.

**Pawos 70**

1. Tan kawenangan ngangon ring :
  - ha. Palemahan Pura Kahyangan Tiga (Desa, Puseh, Dalem) lan Kahyangan desa.
  - na. Setra
  - ca. Pantaraning utawi punden sawah sane wenten pantunia.
  - ra. Tegal pabianan krama siosan.
  - ka. Pura-Pura Paibon, Dadya, Panti miwah genah-genah sane sinanggeh suci.
  - da. Sawah sane medaging pamulan.
2. Prade wenten kadi inucap ring ajeng (1) kadanda manut pararem, saha kadulurin antuk upacara / upakara pamrayascita.

### **Pawos 71**

Tata caraning naban wewalungan :

1. Prade kacunduk wewalungan ngrusak tur tan wenten mariangken, wenang kataban olih sang katiben.
2. Sapasira ugi sane polih naban wewalungan patut :
  - ha. Nyadokang ring prajuru Banjar utawi Desa
  - na. Prajuru patut nureksanin wewalungan punika pramangkin saha niwakang Pamutus manut pararem.
3. Sang maduwe wewalungan patut :
  - ha. Nawur prabea ring sang sane polih naban anut panglokika prajuru banjar utawi Desa
  - na. Nawur prabea ring banjar gung artha manut sadaweg wewalungane punika ical.
  - ca. Prabea inucap kepah dados tiga; asiki ka desa, asiki ka banjar, asiki ring sang Polih naban.
4. Sang polih naban manut kadi ring sor :
  - ha. Sesampun 15 rahina nyadokang ring prajuru taler ten wenten mariangken Wewalungan inucap, patut kasadokang malih ring sang mawangrat.
  - na. Sesampun 21 rahina taler ten wenten mariangken wewalungan inucap kengin Utawi dados kadruenang.
5. Tan kawenang ngadol utawi matungang, yan prade mamurug tur wenten muktiang, keni pamidanda gung artha pangargan wewalungan, ring sang madrue taler kadanda apah dasan ring banjar sang naban.

### **Palet 5 Indik Wawangunan Pawos 72**

1. Wewangunan patut :
  - ha. Ngange Asta Bhumi miwah gegulak Asta Kosala-Kosali, sanistane manut Ring petitis niskala;
  - na. Tan wenang ngayubin ka pisaga bilih – bilih sanggar parhyangan krama utawi desa
  - ca. Ngewentenang paembang sakéng bantang wates sanistané adepa agung;
2. Prade wenten sakadi angka 1 aksara na ring ajeng, risampun kasadokang ring prajuru, keni pamidanda manut pararem;
3. Krama sané mekarya wangunan masusun patut kacumponin olih krama penyandingnya, bilih wewangunan inucap kapastikayang ngelintangin, tur ngawetuang pikobet kapungkuran, manut pararem;
4. Prade ngewangun tepi siringe utawi wates patut ngawentenang paigum ring pangadinia tur masadok ring prajuru banjar lan desa, yan mamurug riwekas prade kawarah olih pangadinia wenang wewangunan inucap kagubar olih sang madrue saha tan polih prabea;

5. Wewangunan ring tepi siring wates pekarangan mangda kawéntenang paembang sanistannyané Depa Agung utawi 1.5 meter sakéng bantang wates, yan pradé wewangunané sampun wénten duk awig-awig puniki kasobyahang mangda kabecikang tur mangda nganggé abangan, lan toya cacapania tiba kajero;

**SARGAH ENEM  
WICARA, BHAYA, DUSTA LAN PAMIDANDA**

**Palet 1  
Indik Wicara  
Pawos 73**

1. Sane wenang mawosin mekadi mutusang wicara ring desa adat inggih punika Prajuru Desa adat sane medudonan mekadi ring sor :
  - ha. Kelian Banjar adat, pradé sang mewicara sane patunggilan banjar utawi wenten ring sejouroning banjar.
  - na. Bendesa Adat, prade sang mewicara sami-sami ring patunggalan desa adat utawi sane mewicara banjar kelawan banjar tiosan
2. Dudonan mawosin sahe muputang wicara warga desa sekadi ring sor :
  - ha. Kaping ajeng kabawosin antuk kelihan banjar
  - na. Tan cumpu ring penepas kelihan banjar ketunasang ring pengelingsir banjar.
  - ca. Paruman banjar tan katinutin raris ketunasang ring bendesa adat
  - ra. Bendesa Adat tan prasida muputan wicara sane wenten, ketincapang ring pengelingsir desa sane kasinanggeh Kertha Désa
  - ka. Pamuput penepas kelihan banjar lan kelihan desa mangda nganutin awig –awig lan pararem
  - da. Prade taler pematut saking kertha desa tan kacumponin, ketunasang ring paruman desa sinanggeh wasananing peputus sesampune polih tetimbang ring majelis alit, majelis madya lan majelis utama.

**Pawos 74**

1. Sahanan wicara mawiwit kacorahan sakaluire sinanggeh nungkasin daging awig-awig, paswara miwah pararem desa/banjar, patut digelis kabawosin tan nyantos pasadok;
2. Sajaba wicara kadi ring ajeng patut nyantosang pasadok sang nunas bawos;
3. Panepase patut pastika nyantenang iwang patut malarapan antuk tri pramana (saksi, likita, bukti) miwah tan maren nepék ring catur dresta minekadi sastra, purwa, loka lan desa dresta;
4. Wicara sane kesadokang yaning durung kebawosang sajeroning awuku patut kawntenang panyumeken, sesampune tigang rahina saking penyeken punika nenten taler kebawosang wenang nunasang pemuput ring sang rumawos sepuput ipun manut dudonan.
5. Nenten kalugra nedunang ARI CENDANI ring prade wenten pasengketa lan wicara
6. Sahananing pemutus patut tan maren Ngupadi :
  - ha. Mangde Krame Banjar utawi krame desa sayan uning pastika ring wewatesan iwang patute
  - na. Mangde sang kawon tatas uning ring kaiwangan nyané
  - ca. Sang molih tan maren katuntun mangda sampunang bes banget nginggilang kepatutania, lila legawa ngampure sang sisip.
  - ra. Nyasap bibit pekayunan sane merase nistura lan memusuh –musuhan

**Palet 2  
Indik Bhaya lan Dusta**

### **Pawos 75**

1. Parindikan baya wenten bacakan Panca Bhaya luire :
  - ha. Jiwa bhaya mekadi kapét patinia, kabinañcana lan sapanunggilan ipun.
  - na. Arta bhaya, mekadi kepondungan utawi kemalingan
  - ca. Gni baya, mekadi katunuan umpami umah puwun
  - ra. Ęr bhaya mekadi keblabaran utawi anyudang embah
  - ka. Bayu bhaya mekadi angin nglinus utawi maulek – ulekan
2. Sang manggihin sehanan baya patut nepak kulkul mapitulung manut pawos 44 indik kulkul.
3. Prade ring desa kahanan jiwa baya patut desane ngelaksanayang Bhuta Yadnya tur sang mayanin katur ring sang rumawos.
4. Sang manggihin kehanan arta bhaya utawi kemalingan patut ngulkul mapitulung manut pawos 44 (indik kulkul) utawi sang kemalingan atur supeksa ring prajuru desa sane pacang nandanin saha mawuwuh penyangaskara prade wenten jadma ngemaling barang sinanggeh suci senistane prayascita jangkep.
5. Pratingkah mapailon ring dusta kebawos seruron, utawi prade wenten jadma manggihin maling tan nyadokang ring prajuru jantos jadme tiwos nyaduung patut kedandha kadi dandhaning maling, makuweh pengargan dandhannyané manut cacakan dusta kemalingan nyane tur prade rawuh ping tiga melaksane sapunike wenang kasukserah ring sang kawiwenang.
6. Sang manggihin wenten ketunuan utawi keblabaran, anyudang embah lan sapanunggilan ipun patut ngulkul mapitulung manut Pawos 44 (indik kulkul) angka 2 aksara ca, miwah katedunin antuk sahanan ayahan sahe gegawan.
7. Sang manggihin wenten angin ngelinus utawi maulek – ulekan utawi linuh patut ngulkul mapitulung manut Pawos 44 angka 2;

### **Pawos 76**

1. Prade wenten jadma ngarereh reramon, minakadi daun kalapa, ron, muah sane lianan tan pasadok ring sang nruwenang, prade kacunduk (katara) patut kadanda kadi dandaning maling;
2. Yening wenten jadma ngaranjingin pakubon wiadin pakarangan tios rikala suwung, patut:
  - ha. Matengeran suara (nguncarang pengaksama manut dresta utawi makaukan);
  - na. Nyantos sang nruwenang karang rawuh utawi masadok ring pangapit pinih tampek, maka buatan pangranjinge;

### **Palet 2 Indik Pamidanda Pawos 77**

1. Desa/banjar wenang niwakang pamidanda ring warga desa sane sisip;
2. Paniwak inucap kamargiang olih bandesa/kelian banjar adat;
3. Wacakan pamidanda luire :
  - ha. Ayahan Panuku Kasisipan
  - na. Danda artha sekadi dosa, danda saha panikel Panurunan
  - ca. Pangampura utawi nyuaka
  - ra. Upakara panyangaskara
  - ka. Kanorayang mekrame utawi kasepekan
4. Pamidanda sane katiwakang patut masor singgih manut ring kasisipane;
5. Jinah utawi raja brana pamidanda ngranjing dados druwe desa utawi banjar;

### **Pawos 78**

1. Krama sane langkungan ring tigang paruman nglantur tan nawur urunan miwah dedandan wenang karampag.
2. Satunggilin krama Desa Adat Buduk sane kabuktiang nganggen padruwén Desa Adat minakadi arta brana utawi raja brana tan pasulur patut ngewaliang ke Desa tur keni danda manut perarem.
3. Yan prade padruwen Desa Adat inucap tan kewaliang manut senger sane kasungkemin wenang ke rampag.
4. Rarampagan ngangge tata cara, kadi ring sor :
  - ha. Kalaksanayang antuk prajuru kasarengin antuk krama desa tigang diri maka saksi;
  - na. Sang ngrampag madasar darsana ngambil barang utawi nyawénin tanem tuwuh, akehnyane manut ring hutang sang karampag;
  - ca. Prajuru miteketang mangda barang-barang sane karampag digelis katebus, masenger awuku ring arahina pacang kadol;
  - ra. Sane patut kaimpasin sajeroning ngamargiang rarampagan inggih punika tan nganinin saluwir barang sane patut inggilang manut agama miwah mademang pangupa jiwa sang karampag;
  - da. Prajuru banjar wenang ngicénin pemargi ring krama melarapan rembug ring sejroning kulawarga agengnyané, mangda krama nenten jantos ke rampag;

### **Pawos 79**

1. Prade sang pacang karampag ngwara (ngalangin) pamargi inucap mawastu sampun tan nganutin utawi nenten ngalinguang sadaging awig-awig desa wenang krama punika kapiteketin indik tata sulur miwah atiti krama dados krama desa adat mangda prasida nganutin sasanan krama manut pangajah Agama Hindu;
2. Prade mamengkung, maparilaksana nyapa kadi aku, wenang karang desa sane kagenahin antuk krama inucap kadaut antuk desane utawi kasepekan manut perarem;
3. Samalih yan purun taler ngalangin pamargi kadi ring ajeng tan wenten pamargi tios sajawaning kawaliang pipil nyane (kawusang makrama);
4. Pamidanda inucap ring ajeng keni buntas risampun sang kadanda punika ngamargiang :
  - ha. Nunas geng pangampura ring krama desa riantukan nguak pasubhaya (perarem) pecak;
  - na. Nawur pangangan panguwak pasubhaya duk pacang karampag kadulurin pamrayascita;
  - ca. Prasida katampi malih makrama duaning sampun sida ngesehin solah prawertin nyane;

## **SARGAH PITU NGUWAH-NGUWUHIN AWIG-AWIG**

### **Pawos 80**

1. Nguwah-nguwuhin awig-awig desa punika kamargiang madasar paruman desa;
2. Paruman inucap mangda kadasarin antuk pakarsan krama desa adat yadiastun kamedalang olih prajuru sinunggal wiadin sinarengan;
3. Awig-awig puniki kamargiang ngawit kaingkupin (kararemin);

### **Pawos 81**

1. Sakalwiring sane wenten sadurungnyane patut kanutang ring sadaging awig-awig puniki;
2. Sakalwiring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem-pararem;

**SARGAH KUTUS  
SAMAPTA  
Pawos 82**


1. Awig-awig puniki kawastanin Awig-awig Desa Adat Buduk
2. Awig-awig puniki kamargiang kasungkemin ring paruman Desa Adat Buduk

**Pawos 83**

1. Awig-awig puniki kasungkemin ring paruman duk dina Saniscara, sasih Kasa Icaka warsa 1941 tanggal masehi 7 Juli magenah ring Bale Paruman Desa Adat Buduk.
2. Awig-awig puniki kalinggatanganin antuk Bandesa, kasarengin kelian-kelian Banjar Adat, saha kasaksinin antuk kelian-kelian banjar Dinas miwah Perbekel Desa Buduk, Camat Mengwi, Majelis Alit lan Majelis Madya, saha kapikukuh antuk Bupati Badung:

Prajuru utawi Dulun Desa :

Bandesa Adat Buduk



**Ida Bagus Gede Putra Manubawa**



Penyarikan Desa Adat Buduk



**I Ketut Miarsa**

Diregistrasi  
Dinas Pemajuan Masyarakat Adat Provinsi Bali  
Nomor :.....  
Tanggal :.....  
**Kepala Dinas**

Ngawikanin  
Majelis Désa Adat Provinsi Bali  
Nomor :.....  
Tanggal :.....  
**Bandésa Agung**

**I G. A. K. Kartika Jaya Saputra**  
**NIP. 19680613 199403 1 012**

**Ida Pangelingsir Agung Putra Sukahet**

